

Premio Nacional di Reconocemento pa e Maestro di Scol

DEA hunto cu Ministerio di Enseñansa lo otorga premio na e “Maestro di Aña”



**MAESTRO
DI AÑA**

ORANJESTAD - Consciente di e balor inmenso di e trabou di un Maestro di Scol y e reconocemento cu e merece, Departamento di Enseñansa Aruba (DEA) hunto cu Ministerio di Enseñansa ta otorga pa di tres aña consecutivo e premio “Maestro di Aña”.

Durante e prome dos añanan di e proyecto (2011 y 2012), un cantidad grandi di alumno a nomina algo mas di 250 Maestro di Scol pa e premio di reconocemento aki.

Juffrouw Raquel Lampe, docente di Cultureel en Kunstzinnige Vorming (CKV) na La Salle College tabata e prome pa ricibi e reconocemento Maestro di Aña na 2011. “Bo tin cu duna di curason, esey ta e diferencia cu hopi biaha e muchanan ta sinti, si bo ta trata nan di curason. Bo mester stima e trabou aki. Esey ta loke ami a wak den e docentenan cu a forma mi desde kleuter te na unda cu mi a yega, y ta docentenan cu te ainda mi por menciona nan nomber paso mi a keda corda nan door di esaki, nan tabata hendenan cu

a haci e profesion aki di curason.” Segun Lampe.

Meneer Derek Peterson, maestro den klas 6 di Colegio Frere Bonifacius, a ricibi e titulo Maestro di Aña 2012. “Loke mi ta gusta hopi di mi profesion ta cu bo ta forma e muchanan y prepara nan pa un otro klas of un otro scol. Na final di aña mi ta wak con

nan a progresa”. Derek a remarca.

Considerando e metanan di e proyecto; atencion positivo pa enseñansa, reconocemento e pa trabou di e Maestro di Scol, ilustra y stimula maestro di calidad, e aña aki kier enfoca mas riba e cosnan positivo cu ta sosode den klas, danki na e esfuerso di e Maestro

di Scol. Henter comunidad: alumno, estudiante, mayor, coleganan maestro y/of cabezante di scol, ta bonbini pa nomina un Maestro/a di Scol. Por haci esaki door di yena e formulario di nominacion pa Maestro di Aña 2013 obtenibel riba website di Enseñansa Aruba www.ea.aw.

E nominacion ta habri pa tur Maestro di Enseñansa Preparatorio, Basico, Special, Avansa y Profesional. E periodo di nominacion pa aña 2013 ta habri for di riba World Teachers' Day dia 5 di october y lo cera dia 31 di october. Pa mas informacion di e proyecto aki of di Enseñansa na Aruba por acudi na nos website www.ea.aw. Tambe por sigui Enseñansa Aruba y/of Education Aruba riba Facebook y Twitter pa keda na altura di tur informacion. □

